

Western Naga Youth Forum tentettsü memulunger

Dimapur, Aami/June 22 (TYO): Western Naga Youth Front (WNYF) nüngja agütsür lanur telok tentettsü memulunger aser iba pei jurisdictions nung iba amala lokti tentettsü memelatsü, ta Western Sumi Youth Front (WSYF) aser Chakhroma Youth Organisation (CYO) ajanga sangdong ka nung ashi.

Honibarnü WSH Hiyam, Chekiye village nung WSYF aser CYO telungjem senden ka mena tanü nübürtemi ajangshiba tebilemtsü aser talisa Naga society nung lokti tentet tasen zünger mezüngba tentetba indang jembia liasü.

Kasa tangatetba aliba nisung telok ka WNYF dentettsü tebilemba nung senden ka ayongzüka liasü, ta lanur tentet ana yagi ashi aser July 17, 2020 nung Chakhroma Public Organisation aser Western Sumi Hoho lungjemer pangzüng ka renema aliba aser October 23,

2024 nü Chakhroma Youth Organisation aser Western Sumi Youth Front lungjemer pangzüng renema aliba lephsia ashi.

Dimapur, Chümoukedima aser Niuland district asem ya awabangtsü nükjidong nung nisung kari WNYF tentettsü merangba khenyongi memulunger, ta lanur tentet ana yagi ashi.

Parnoki par jurisdiction nung iba ama lokti tentet mesüra lanur telok nisung shinga nema medentetdaktsütsü ta ashi.

Parnokisa züngsem ajunga dang iba ama lokti tentet nung shilem magitsü mesüra madentsü totuyuba agütsüogo aser aibelenem tapet temerenshi agütsütsü ta ashi.

Parnokisa züngsem ajunga dang parent body anaprong aser Chakhroma Youth Organisation aser Western Sumi Youth Front ajanga pangzüng yanglua aliba akumtsüboa aser kumzüka ayutsü ayongzüka liasü.

Region nung Americanunger ajungadaktenükyoktsü: Iran

Tehran, Aami/June 22 (Agencies): Region nung "American civilian aser military" ajunga "legitimate target" ka ama züngshitsü, ta Iran-i Deobarnü tekumdangtsü shiogo.

Deobarnep US-i tayimtsü amshia Iranian nuclear sites tongtipang asem - Fordow, Natanz aser Isfahan amakba sülen iba tekumdangtsü ya agütsü.

Operation Midnight Hammer nüngja agütsüba US mission nungya B2 stealth bombers tenet amshi aser ibai US puti otsü nung B-2 amshia amakba rongnung

tesashitiba alitsü.

Tehran nung Iran Tir Masoud Pezeshkian dener nübürtemi US mapa aija longkak aita liasü. Tehran yimti tiyong nung nübürtemi "Mang ayangtsü!" ta ayimtena liasü.

Iran indang Health Ministry ajanga iba tesem nung nisung aika yiru saka radiation agi timtem agütsübabo mali ta ashi.

US inyaksangshi ya nuclear nok-nü aiba linük kati nuclear nok-nü maliba linük ka anema tashiyim amshiba lir ta Iran health ministry odongtar Hossein Kermanpour-i aitsü.

Lanurtem mechi state nung 'third language' sangdongtsüla: S. Supongmeren Jamir

Dimapur, Aami/June 22 (TYO): Nagaland state densema North Eastern region indang Post Offcies nung non-local Gramin Dak Sevaks (GDS) shimba tebilemtsü lemsatepa Nagaland nungi Lok Saba züngsem S. Supongmeren Jamir-i Nagaland Chief Minister dangi tezüluba ka agüja liasü.

Postal department nung Grade IV staff GDS shimba ya online nung ajemdaker lir aser Class X pass certificate aser marksheet meshir aser interview mesüra tatidang magir.

Department of Posts ajanga Nagaland asoshi local language/ dialect agüja aliba nung ajemdaker candidate ya Class X nung English/Hindi nung marks anguba nung ajemdaker shim. Iba yagi oshi ana ya yutsür candidate temi oshi tasembuba zünger aliba menüngdak kumdaktsür, ta MP Lok Sabha, S. Supongmeren Jamir-i ashi.

Iba den külemi local candidates tem linük ajunga den toktepba nunga kongshir. Tesüiba küm ana kisüng nunga Nagaland atema posts 364 asoshi recruitment aseben agia liasü aser yangji January 2023 nung posts 143 atema sangdongba dena lir.

Director General of GDS ajanga Chief Postmasters General Northeast circle dangi 18th Lok Sabha Standing Committee indang Department of Posts-Initiatives and

Challenges' (Annexure II) subject nung züluogo. Yangji point 2 (iii) nung Nagaland nung English ya official language ama agizüka lir aser North East Circle Post Office-ia recruitment mapang 'medium of evaluation' ama züngshitsüsa local language/ dialects jangjatsü asoshi state sorkar den jembiteptsü tepang agi züngzüktepa liasü, ta MP S. Supongmeren Jamir-i ashi.

Iba amaji Director, Postal Services, Nagaland ajanga Home Commissioner, Government of Nagaland nem April 16, 2025 nü osang agütsüogo.

Constitution (Nagaland) Scheduled Tribes Order kübok Nagaland indang Home Department ajanga Kachari, Kuki, Garo aser Mikir den kin 15 recognize süa lir. Iba den Home Department: Home Branch, Nagaland ajanga Tikhir kin ya Naga nunger kin balaka ta recognize süa lir (Annexure V). Ajisüaka state sorkari tanü tashi item kin indang oshi ya state nung 'third language/dialect' ateam recognize süa mali. Iba atema Home Department, Nagaland ajanga Commissioner, Government of Nagaland (Annexure VI) aser Commissioner & Secretary, Art & Culture dangi parnok tangatetba lemsateptsü züluogo, ta pai ashi.

Nagaland ama Arunachal Pradesh nunga kasa timtem ajurua liasü, kong GDS

recruitment atema nüngdakba oshi ya English aser Hindi dang shia liasü. Iba tebilemtsü bentettsü atema Arunachal Pradesh indang state sorkari parnoki recognize süa aliba tribal dialect/language 23 ya 'Third language' ama Director General of Postal Services, Department of Posts, Dak Bhawan, New Delhi nem osang agütsü, ta pai ashi.

Iba sülen Department of Posts ajanga Government of Arunachal Pradesh atema sangdong agütsüba anogo nungi küm pongu asoshi par tribal nisungtemi jembiba oshi 23 ya 'third language' ama ozüng balaka yanglu aser iba yongji Department of Posts-i nübu shimba mapanga item oshi ya agizüka amshir, ta MP Lok Sabha S. Supongmeren Jamir-i ashi.

Deputy Commissioner mesüra state sorkar nungi temelaba agüja aliba ketdangsüri tribal oshi junga jembitetba aser metetba atema certificate agütsütsü, kechiaser tang school tem nung item oshi ajakyabo Class X tashi mesayur.

Anungji tim department ajanga state nung tribal oshi ya 'third language' ama recognise südaktsütsü mepishir. Iba maparen mapang shidak nung nai inyaktsü imlaa atar, koba ajanga state nung lanurtem nem employment agütsütsü, ta MP, Lok Sabha S. Supongmeren Jamir-isa shiti nung ashi.

US-i Iran amakba atema linük balala lenirtem ola adoker

Aami/June 22, 2025 (Agencies): United States-i Iran nunger nuclear sites asem nung tayimtsü amshia amakba atema linük balalai telangzüba balala agütsür, kong Israel-i Trump telemtetba tenüng asang, UN-i tensa ajemdaktsütsü ajungshir aser Iran den linük kari aitsür.

Israel Ati Kilonser Benjamin Netanyahu-i Tir Donald Trump tenüng sanga, "Alima nung lendong tulutiba aliba yimli nem Tir Trump-i alima nung nok-nü tesashitibamagütsüdaktsü ta puti otsü alitsü," ta ashi.

"Tenüngsang agütsür, Tir Trump. United States indang tashi tulu amshia Iran indang nuclear facilities amaktsü nai tasü tait telemtetba agiba ajanga puti otsü melenshitsü," ta pai ashi.

Iran Foreign Minister Abbas Araghchi-i ibai tesüngmangtsü majung aser tatem maka timtem alitsü ta ashi.

"United Nations Security Council nung permanent

member, United States-i UN Charter, international law aser NPT nung kanga mejungi aibelena Iran indang peaceful nuclear installations amak. Tanem iba tatalokba ya tesüngmangtsüka majung aser tatem maka timtem alitsü," ta pai X nung zülü.

"UN Charter nung self-defence nung tetemsü telangzüba agütsütsü mela aliba ama, ozü sovereignty, tejangraba aser nübur kumzüka ayutsü Iran tashi aser temeden lir," ta pai ashi.

US-i tayimtsü amshia Iran amakba atema UN Secretary General António Guterres-i süoki ia bilemba lemsatepogo aser yangi lendong tulu lir, koba ajanga international peace aser security asoshi timtem keta lir ta ashi.

"Tanü United States-i Iran anema tashi amshiba asoshi ni kanga aoksar. Tatembang nung aliba region nung ibai lendong tulu lir aser international peace aser security asoshi timtem lir.

Iba rara ya kanga kera mazüokteti aotsü ta takzür aser takoksa ya civilians, region aser alima ajunga nung alitsü. Member States dang tensa tajungba kumdaktsütsü aser UN Charter aser danga international law sülen anidaktsü ajungshir. Iba ama mepetmesü mapang rongrongshirong prokshia aoba nungi jenbua alitsü kanga tongtipang. Military solution mali. Tejakleni aotsü lenmangji diplomacy dang lir. Teimla ajak agi yimjung dang lir," ta pai ashi.

New Zealand Foreign Minister Winston Peters-i tarutsü nung tensa tesashiba akumba nungi jenbua alitsü tongtipang ta ashi aser tensa azüoktsü asoshi yaritsü ta ashi. Pai telok ajak dang jembishinü daki meyipa shilangtsü ajungshi aser tanen makai mitkar inyakyim dang nungibo tajunglen ajanga jembishinüba nung tangatettep talangba alir ta ashi.

Australia sorkar indang

odongtari, "Iran indang nuclear aser ballistic missile program ya alima nung yimjung asoshi timtem tulu ta onoki jangja-jangja shia arur. US Tiri sangdong nung yimjung asoshi mapangji tang ya lir ta ashiba angaokogo. Region nung tensa kanga mejungi lir. Tensa azüoktsü, jembishinütsü aser diplomacy asoshi maneni ayongzüker," ta ashi.

Mexico indang Foreign Ministry ajanga Middle East rara nung yimjung lidaktsütsü asoshi sorkar aser yimden yimsüsür tsüngta tekeraba nung jembishinütsü ayongzüka liasü.

"US-i Iran indang nuclear facilities nung bomb pokloktüba onoki khukhua aitsür, koba ajanga Middle East mepetmesü tamajungba kumdaktsür. Parnoki UN Charter aser international law nung kanga sashia aibelenogo aser melenshitsü makokba timtemi meimchir yoker," ta Cuba Tir Miguel Diaz-Canel-i ashi.

UK Ato Kilonser Keir Starmer-i, "Iran indang nuclear sentong ya international security asoshi tebilemtsü tulu lir. Iran nem kodanga nuclear nok-nü meyangludaktsütsü, aser US-i iba tebilemtsü ajemdaktsütsü mapa inyak. Middle East nung tensa mejungi lir, aser süngjema alitsü tongtipang. Onoki Iran dang langpangi arua jembishinüba iba mepetmesü tatem kati arutsü ayongzüker," ta ashi.

European Commission indang Vice-President Kaja Kallas-i Iran nem nuclear nok-nü meyangludaktsütsüla, ta ashi.

Pakistan indang Foreign Minister Ishaq Dar-i sangdong ka nung US-i Deobarnü Iran indang nuclear facilities amakba aitsü aser parnoki international inyakyim ajunga nung aibelenogo ta ashi.

European Commission Tir Ursula von der Leyen-ia Iran nem nuclear nok-nü meyangludaktsütsüla, ta ashi.

Y.Patton-i Chukitong jila nung De-Addiction Centre ka semzüksü



Deputy Chief Minister, Y. Patton-i June 21 nü Chukitong jila nung De+ addiction center lapoktsüba noksa nung angur.

Dimapur, Aami/June 22 (TYO): Wokha district nung temesepba mozü achiba agi timtem agütsüba bentetsü atema tongtibang jenjang ka agia Deputy Chief Minister Yanthungo Patton-i Wokha district kübok Chukitong jila nung June 21 nü District De-Addiction Centre (DDAC) semzüksüogo.

Iba centre ya Bethesda Youth Welfare Centre, Ministry of Social Justice and Empowerment (Government of India), Department of Social Welfare (Government of Nagaland), aser Wokha District Administration nunger longjemer amenokogo, koba mozü achirtem nem structured rehabilitation aser recovery services agütsütsü atema lir.

Alakteta jaoker ama sentong nung o jembiba mapang Deputy Chief Minister Patton-i, Wokha nung alirtem dang temesepba mozü achiba ajanga lokti nung timtem adokdaksüba ya longjemer raratsü ayongzük. Pai kidanger state den arrtsü nung aliba Bhandari sub-division indang tatishitsü bener arua jembiba, koba pai ashiba agi, temesepba mozü aser yi belener arutsü atema transit point ka kumogo.

Tawa national report ka indang jembiba mapang pai, Nagaland ya HIV tashidak aketba state tem rongnung Mizoram sülen tanabuba jenjang nung aliba indang data ajanga sayuba ya kanga süoki ia bilemba lemsatepba den tangsa tang jenjang tapet agitsü nungdakba lemsatepa liasü.

Patton-isa, DDAC amenoktsü atema local lenirtem aser stakeholder temi jenjang tapet agiba atema parnok nem tenüngsang agütsü, aser iba centre ya tanga institution ka ama dang masü saka mozüchirtem melenshiba tesem tongtibang ka akümtsü imlaba lemsatep. "Centre aika amenokdang nungibo ka ya teperi südaksüti, aser mozü achirtem dak temelenshi adokba repringtetdaksüti," ta pai ashi.

Paisa, Chukitong jila ya Lotha nunger atema shisaliok renlok dak tesem ka lir ta shia, iba jila yagi lokti nung temelenshi bener arutsüba shilem maneni agitsü ajungshi.

Aluyimba ya rongsenketzüng terenlok asoshi kanga dang tongtibang, saka district nung aluyimertem tajemba kuma aoba indang süoki ia bilemba lemsatepa Patton-i asendenshir

aluyimba, local entrepreneurship, aser tangar dak memetaloki alitsü atema rangloker inyaksü ajungshia liasü.

Maneni pai, Arogo tenzükertem dang lokti taneptsü aser nüburttem aser talisa lanurtem dang lenmang shitakba sayutsü atema tongtibang shilem agitsü ajungshi.

Iba sentong nung Advisor Mhathung Yanthan-ia shilem agi aser pai, iba centre takok tashi amshitsü koda tongtibang iba indang lemsatep. Paisa, lokti nung telen ajak dang iba inyakyim nongita yaritsü aser taküm melenshidakja temesepba mozü amshiba ajanga kibongtem kongshir aliba yanglushitsü asoshi nükjiding yur inyakba ataloktsü atema teyari agütsütsü ajungshia liasü.

Kasa mapang nung Deputy Commissioner Vineet Kumar, IAS-i, iba centre amenoktsü atema teyari agütsür ajak dang kanga pelaba lemsatepa liasü. DC-isa, temesepba mozü achiba ajanga kangshia alirtem iba nungi pila lidaksütsü atema lokti-i longjemer shilem agitsü koda tongtibang iba indang lemsatep.

Iba De-addiction center nung tang nisung 10 lir.

DDO tem training ayonger

Dimapur, Aami/June 22 (TYO): EPAY aser eGPF systems tasenba amenoktsü benoker aliba dak sendakba nung June 24 nungi July 1 nü tashi DDO tem ajak training sessions agitsü.

Applications anaprongla dry-run phase ya July 1 nü tenzüksü aser August 31 tashi aotsü. Iba mapang tang tamshidak system aser tasenba naprongla ya külemi

dang amshitsü.

DDO ajaki tang amshia aliba system den system tasenba amshitsüla. Tang amshia aliba system ya validation, user training, performance monitoring, aser issue resolution atema amshitsü. Iba atema Annexure I nung aliba ama training agitsü, ta Director & HoD-i sangdong ka ajanga metetdaksü.

Nokpu yimtsüng nung Liangmen Fish Sanctuary semzükogo



Dimapur, Aami/June 22 (TYO): Mokokchung District, Mangkolemba Subdivision kübok Nokpu yimtsüng nung tzü shirurtem kumzuka ayutsü atema Liangmen Fish Sanctuary semzükogo.

Iba inyakyim ya Tzükhuchanger Jupang aser Nokpu Village Council aser Saringyim (Nokpu B) Village Council nungeri anir tenzük aser iba sentong kübok Liangmen ayong nung ango chanu 50,000 shi chiokogo.

Local süngtonglitong aser arem shiruru wazüka ayutsü atema tangazükba agütsütsü nükjiding nung iba sanctuary amenokogo. Arem shirur aser süngtonglitong wazüka ayuba

dang masü iba sanctuary ya senzusenponger aser süngtonglitong aser aremshiruru meimertem atema semdangtsü tesem tajung ka asütsü, koba tebur tajung lir.

Tzükhuchanger Jupang aser village council anapronglai, ango chanu anepalutsü atema Temsuwapang Longchar (AFI Mokokchung) dang kanga pelaba lemsatepogo. Maneni Lanuchuba Imchen (DMC Councillor, Ward 20) danga pai teyari agütsüba atema mejeta pelaba ka lemsatepogo.

Jupang-isa, arem shiruru aser süngtonglitongtem taliba wazüka ayutsü atema parnok sentong aliba lemsatepogo.

Imchen's Custom Art School-i ayongzuka creative painting tetoktepba agi



Imchen's Custom Art School Proprietor Moa Imchen den tejaokertem aser sentong nung shilem agirtem tangokba noksa nung angur.

Dimapur, Aami/June 22 (TYO): Imchen's Custom Art School aser national Peoples Youth Front Nagaland State NPP na longjemer World Music Day nü creative painting tetoktepba ka AG Colony Council Hall, Kohima nung ayongzuka agiogo.

Proprietor Moa Imchen ya 3D architectural designer ka lir, pai ashiba agi, music yagi kecha tebandang makai alima nung alir ajak longjemdaksür. Iba anogo nungdem nung sentsüh balala amshia Art tetoktepba ka agiogo.

Paisa, Art aser craft inyakyimtem yagi tajangzük aika agütsür aser iba ajanga tekelok shisatsü aser shitemang terenlok asoshia teyari agütsür. Item ya mapang intoktsüba atema dang masü saka nisung

ka terenlok aser angazüksü atema senti hadir lir, ta ashi.

Pai ashiba agi, school nung kecha tebandang makai ajak nem maongka agütsür, kong Children with Special Needs (CwSN) tem densema lir.

Maneni paisa, curriculum nung 3D architectural designed course ka benokogo koba junior aser senior category naprongla atema asütsü, ta ashi. Imchen-i art asütsü jangrartem dang parnok sempet arantgetshia professional akümtsü ajungshia liasü, koba takok tajung ngua tajangzük akaba carrer ka lir ta ashi.

Advocate Imchayanger Pongen, shiba iba sentong nung tena liasü, paia art jangrartem ayongzük aser parnok dang temaba jenjang tongteta professional akümtsü ajungshi.

National People's Youth Front (NPYF), NPP National tir Nicky Nongkhaw-i, World Music Day dak sendakba nung pa tebilemba lemsatep aser music ya ajaki angatetba oshi ka, koba pei tebilemba lemsateptsü atema amshir, aser iba dak creativity, teamwork, discipline aser emotional well-being sendaka lir ta ashi.

Nonghlaw-isa, iba benjung nung NPYF Nagaland State-i shilem agiba atema tenüngsang agütsüba den sentong takok asoshi longjemer inyakba lokti tentet; IMCHEN'S CUSTOM ART SCHOOL OF KOHIMA, NOTE GRID SCHOOL OF MOKOKCHUNG aser THE INSTITUTE OF MUSIC EDUCATION DIMAPUR nunger dang kanga pelaba lemsatep.

NITI Academy-i 2buba Morung Scholarship Test indang metetdaksü

Dimapur, Aami/June 22 (TYO): NITI NEET-JEE Academy, Nagaland-i, July 1 nü nungi Repeaters Batch tasen amenokba sangdongogo.

Iba batch ya Class XII nung azüngertem mesüra Class XII pass süir alirtem mesüra medical mesüra engineering career atema NEET mesüra JEE tatidang agütsür alirtem shirnok doctor mesüra engineer akümtsü mesüra board tatidang nung tajungba agütsütsü atema taruba tatidang asoshi renemshia liner parnok asoshi lir.

Computer education agütsü tenzükür küm 25 ajungba nungdem nung coaching tajung agütsütsü atema NITI (NEET-JEE) Academy-i temsüa aliba kaketshritem parnok Class XII marks mesüra NEET score dak ajemdaker 2buba Morung Scholarship Test (MST) agitsü.

Class XII Marks dak ajemdaker MST Scholarships ya 95-100% Marks angur nem

50% Scholarship, 80-95% Marks angur nem 30% Scholarship & 60-80% Marks angur nem 20% Scholarship agütsütsü.

Item scholarship tem ya meranga inyakba aser academic merit atema tushitsü atema lir, aser iba ajanga Nagaland kübok tesem balala nungi aser kidanger state tem nungi kaketshritem nem jenjang aketba coaching agütsütsü atema lir.

NITI NEET-JEE Academy ya medical aser engineering entrance atema renemtsü asoshi Nagaland nung institute rongnung tajungtiba ka lir. Iba institute yagi küm 25 tashi lanurtem career yangluja arudar. Academy ya NEET aser JEE agütsütsü jangrartem nem jenjang aketba tesayuba, updated study material agütsütsü, parnok teti asadanga alitsü aser kaketshir shia dang mejeta lenmang sayutsü atema bendanga agütsür lir.

Iran nungi ano India nungner 311 anir aruogo



June 22, 2025 nü Iran kübok Mashhad yimti nungi tayimtsü ka ajanga New Delhi tonga aruba sülen tangokba noksa nung angur. Amongnü Iran nungi India nungner 311 anir aruogo.

New Delhi, June 22 (Agencies): Operation Sindhu kübok maneni Iran nungi ano India nungner 311 New Delhi tonga anir aruogo. Iran aser Israel na tsüngda rara tamajungba akümba mapang Iran kübok Mashhad yimti nungi India nungner 311 anir aru. Tang tashi nung India nungner ajak senteper 1,428 India tonga anir aruogo, ta ketdangsertemi metetdaksü. Amongnü India nungner 311 ji tayimtsü ka ajanga anir arua nikongdang 4:30 ako nung Delhi atong, ta MEA-i metetdaksü. "June 22 nikongdang 4:30 ako meta Mashhad nungi India nungner 311 New Delhi tonga anir aruogo," ta ministry of external

affairs (MEA) otongdar, Randhir Jaiswal-i metetdaksü. Hokolbarnüa Iran kübok Mashhad nungi India nungner aika anir aru. Armenia yimtiba Yerevan aser Turkmenistan yimtiba, Ashgabat nungi India nungner aika anir aruogo. MEA-i ashiba agi, Hokolbarnü Mashhad nungi tayimtsü asem nung India nungner apusodaktsütsü atema Iran-i airspace tenokdangba agiena liasü. Hokolbarnü mezüngbuba tayimtsü nungji India nungner 290 Delhi tonga aru aser Honibarnü tanabuba tayimtsü nungi India nungner 310 anir aru. Brihostibarnüa Yerevan nungi aser Honibarnep Ashgabat nungi tayimtsü ka

nung India nungner aika anir arua liasü. Iran nungi India nungner anir arutsü atema taoba Bodhbar aonung Ministry of External Affairs (MEA)-i 'Operation Sindhu' tenzüka liasü. MEA-i Iran nung aliba India sensotem dang Iran yimtiba, Tehran nung aliba Indian Embassy den emergency helpline ajanga tongteprateptsü aser New Delhi nung MEA-i amenokba 24x7 Control Room den tongtepratepa alitsü metetdakja liasü. Operation Sindhu kübok mezüngbuba tayimtsü nungji Brihostibarnü India nungner 110 Armenia yimtiba, Yerevan nungi New Delhi tonga anir arua liasü.

PM Modi-i Iran Tir, Pezeshkian dang rara anentsü mepishi

New Delhi, Aami/June 22 (Agencies): US-i Iran nung nuclear facilities kar amakba sülen Amongnü Ato kilonser Narendra Modi-i phone ajanga jembidang Iran Tir, Masoud Pezeshkian dang rara anentsü mepishio. Israel aser Iran na tsüngda rara tenzüka sülen anogo ternübuba nung Ato kilonser Modi-i Iran Tir dang raraba tensa tamajungba mekümdaktsütsü, ken o jembitsü aser yimtenren inyakyim ajanga ken o bentettsü mepishi. Tesülen Modi-i X ajanga, "Iran Tir @drpezeshkian den jembio. Künati tang tensa

indang tejangja lemsatepogo. Tawa tensa tamajungba akümba atema tebilemtsü katsür. Tangsa rara anentsü, ken o jembitenren ajanga inyaksangshiba ajanga region nung yimjung aser security alitsü atema lephsia metetdaksüogo," ta metetdaksü. Phone ajanga minute 45 shi jembidang Iran Tir Pezeshkian-i, "India ya tembar ka aser region nung yimjung aser security ajungkettsüba partner linük ka," ta ashi. Honibar aonung US-i Iran nung nuclear facilities amakba sülen Iran Tiri Ato kilonser Modi dangi call süa jembidang tang

tensa osang tejangja metetdaksü. Region nung yimjung aser security atema India ola aser India nungner shilemji kanga tongtibang, ta pai ashi. Israel aser Iran na tsüngda rara nung US-i shilem agira ibaji ajanga teraksatsüba tulu ajurutsü aser, ta Iran Supreme lenir Ayatollah Ali Khamenei-i US amokmerena lir aser Iran foreign ministry-ia, iba rara nung US-i shilem agira ibaji ajanga region nung rara tulu adokdaksütsü, ta metetdaksüogo. Yamaji amokmerenaka yasüng US-i Iran nung nuclear facilities maakogo.



June 22, 2025 nü Raipur nung Union Home Minister, Amit Shah-i Chhattisgarh, Andhra Pradesh, Telangana, Madhya Pradesh, Maharashtra, Jharkhand aser Odisha state tem nungi DGPs/ADGPs aser tongti ketdangsertem den senden mena Maoists tensa asadangba mapang tangokba noksa nung angur.

Pahalgam amaker kiralongrartem yariba atema nisung ana puogo

New Delhi, Aami/June 22 (Agencies): Amongnü National Investigation Agency (NIA)-i, Jammu & Kashmir kübok Pahalgam amakba nung shilem agir kiralongrartem asem yariba atema nisung ana puogo, ta metetdaksü. Tai tonglokja alir nisung anaji Batkote nungi Parvaiz Ahmad Jothar aser Hill Park nungi Bashir Ahmad Jothar na lir. Tenaprongla ya Pahalgam nung alir. Tenati kiralongrartem asem jenokdakja chiyungtsü agütsüba den külemi teyari balala agüja liasü. Pakistan nung amenoka aliba Lashkar-e-Taiba (LeT) züngsem asem yariba atema tena apu, ta NIA-i sangdong ka ajanga metetdaksü. Kiralongrartemi Pahalgam amakba sülen RC-02/2025/ NIA/JMU ken o benoka liasü aser NIA-i iba ken o bushisüngdang. Nisung ana jagi kiralongrar asemji Hill Park area kübok azüki (dhok) ka nung

jenokdakja liasü. Asüngdangyaba mapang nung Parvaiz aser Bashir nati Pahalgam amaker asem maitsüji (tenüng) metetdaksüogo aser par asemporonglaji Pakistan nungner lir ta shio. Kiralongrartem jagi Pahalgam kübok Baisaran Valley nung raliwalirtem dang tamangba yimsü tama asüngdangba sülen khaseta liasü. Iba tatalokba nung tebur 26 khaset. Kiralongrartem yariba atema Unlawful Activities (Prevention) Act, 1967 kübok Arrla 19 nung ajemdaker nisung anaji anema ken o benokogo aser maneni bushisüngdangdar. Taküm April 22 nü Pahalgam nung kiralongrartemi amakdang raliwalirtem teimba ser nisung 26 tepset. Asürtem rongnungji Nepal nungner ka aser UAE nungner ka densema liasü. Raliwalirtemji Maharashtra, Karnataka, Haryana aser West Bengal nungi teimba liasü.

Iran amakba atema Trump nem Nobel Prize agütsütsü asü?: Owaisi



New Delhi, June 22 (Agencies): Tamalen Pakistan-i Nobel Peace Prize atema US Tir, Donald Trump tenüng benokba atema Pakistan sashia aija Amongnü AIMIM party tongti lenir, Asaduddin Owaisi-i, US-i Iran amakba atema Donald Trump nem Nobel Peace Prize agütsütsü asü?, ta asüngdang. Interview ka nung jembidang Owaisi-i, Pakistan-i Trump pusem saka US-ibo Iran nung bomb pokloktsü, ta ashiba den külemi tawa White House nung Trump ajuruba atema Pakistan Army tongti, General Asim Munir aitsü. Honibar aonung US-i Iran kübok Isfahan, Fordow aser Natanz nuclear facilities amak. US-i Iran amakba dak sendakba nung Owaisi-i, "Iba atema ya Pakistan General (Army chief Asim Munir)-i US Tir den külemi chiyung asü? Tanü item ajakji jungkai adokogo," ta ashi. Israel Ato kilonser Benjamin Netanyahu-a aija Owaisi-i, US-i amakba ajanga US-i pa yariogo, ta ashiba den külemi pa (Netanyahu) ya Palestine nungner tepsetsang, ta ashi. "US-i amakba ajanga Netanyahu yariogo. Pa ya Palestine nungner tepsetsang.

Palestine nungner 55,000 tepsetogo aser iba atemaji US-i shisamebulur," ta Owaisi-i ashi. Iran ket nung nuclear amokmeren ya tiyazü, ta shia Hyderabad MP Owaisi-i, "Iraq aser Libya nunga kasaji atalok. Item linüktem nung teraksatsüba tulu adoktsüsa hadir lir ta parnoki ashi, ajisüaka tiyazü liasü," ta ashi. Middle East nung rara tulu adoktsüa akok, aser ibaji ajanga India nungertema aika takoksa tulu angutsü, ta pai ashi. "Gulf aser Middle East nung India nungner million 16 dak tali lir, asenoki ibaji mamadoktsüla, aser rara tulu adokra ibaji ajanga oagi alir India nungertema mejungi kongshitsü," ta pai ashi. Middle East region ya India nungner rongsenkettzüng atema kanga tongtibang, ta shia Owaisi-i, "Item Arab linüktem mesüra Gulf linüktem nung India nungner company tem investment aser foreign investment shilem tuluka iba region nungjagi lir," ta ashi. Iran nungner nuclear programs nokdangtsü nükkjiong nung Honibar aonung US-i B-2 bomber tayimtsü trok nungi bomb 12 amshia Iran nung nuclear facilities asem amak.



TIR YIMYIM YIMOBILEM (EDITORIAL)

DIMAPUR MONDAY, JUNE (AAMI) 23, 2025

Temang asoshi yoga

Indian-i anir yakanü alima ajak nung Yoga anogo mungogo. Yoga ya temang anema alitsü asoshi kolakosüba, exercise, inyakyim ka lir, ajisüaka asenok aikati temulung ajak agibo magizükteter aser tanema anemer, kechiyong Yoga ya Hindu tamangba yimsu dak amendaka lir ta bilemer aser aji shitak lir. Yoga tetezü Sanskrit oshi nung Yuj, tetezü longjemdaksüba, kechiyong Yoga yabo tanga temang kolakosüba exercise agiba ama masü saka tekolok aser temulungjang dena ajak sungjemdakja, tangoa sota-sota meilongi dang stoker aser temang nung lokteplokra ajak arakzüdakja agiba exercise tapu ka lir. Aji oda, tanga exercise amato ka masü saka Yoga exercise yabo agia-agia tekolok aser temulungjang jungjunga sungjemdakja tanela den longjema Om....ta tango matem tashi sarasademba yimya nung ola adoka ashir. Iba jagi balaka asenok Khristan-tem aikati Yoga agitsübaji mesademi bilemer aser government-i, talisa, kaketrejutem nung Yoga anogomung nung kangtepa shilem agitsü asoshi metetdaksuaka Khristan-temi lapokba school-tem aika nung Yoga agitsü memelungba dang masü saka tenokdanga nokdang. Aji oda, Nagaland nunga Nagaland Baptist Church Council aser Ao Baptist Arogo Mungdang (ABAM) ama Khristan telok telongjem tulutemibo alima Yoga anogomung mamungtsü asoshi odia sangdongba asenoki angur aser angashir. Ajisüaka, kodang asenoki itemji jungjunga bilemdangdir, center government-i asenok dang Yoga anogomung amungtsü asoshi ozüng küma metetdaksüba o asenok Yoga anogomung mamungtsü atema metetdaksüba na tangatetba jenjangji kasa dang akümer, kechiyong Yoga-ji temang anema alitsü atema dang süra nubortem nem tangatetba tajung agüja agidaksütsü merangtsüba dak alaka kecha balaka ozüngsa agidaksütsü nüngdak madoker, ano külen Khristan-i Khristan ka kangshia tangatetba ka kübok ayutsü merangbajia Laishiba tetuyubabo masütsüa akok, kechiyong Yisui Pa sülen anidaksüba yabo ozüng agi masü saka temeim agi ajar. Tanü asenoki aji bendangtet nungang, ano, Tsüngrem temeim tali jangjatsü südi. Atangji, alima aika nung Muslim yimsü yabo kangshia amangdaksür saka Khristan yimsü yabo kangshia amangdaksütsüba aser amangtsüba yimsü nasü, yabo Tsüngrem temeim angateta alima nung temeim mapa inyaksüba Tsungremer tesayuba mapa ka lir. Aji kodang angatetdir, shingaia mekangshiyonga asenoki Tsüngrem temeim indang jembitsü aser inyaksü. Aji oda, asenok atema Yoga agitsü asü magitsü ta asübaji tongtibang masü saka tangari asenok ya Yisu nütsünga ta reprangtettsüsa asenok alir asü malir ta asübaji dang Tsüngrem asoshibo tongtibang asütsü. Atangji, Yoga agibaji pei angatetba nung temang anema alitsü asoshi kolakosüba exercise ka dang süra agiang aser aji shingaia ozüngsabo tenokdang saka ano aseni Yoga agiba ajanga kar danga tamang nung metsüdaksüsa kümra magiang tajungba, aji Yisui sayuba lenmang, kechiyong temang anema alitsü asoshibo Yoga ya dang masü saka ano exercise tapu aika lir.

OLEMSABANG

LKM 'NÜKMENMONG' AMONGBA DEN LT. L PANGERSOWA JAMIR AWARD AGÜJA OCHIBA ELECTION TETOKTEPBA ALI



21st Aami (June) 2025 anogo Langpangkong Kaketshir Mungdang(LKM) 'NÜKMENMONG' aser Lt. L. PANGERSOWA JAMIR TRUST AWARD For ACADEMIC EXCELLENCE agütsüba sentong den külemi OCHIBA ELECTION(Clean Election) nung ajemdaker Hq. Chuchuyimlang, Chuchuyimlang Town Baptist Arogo Jubilee Memorial Hall nung sentong Akhümdong Dr. Yashizünga Yaden, PGT MGHSS, Ochiba Onük Jembir Pastor.Temjen Longkumer, Nükshiyim Baptist Arogo, tajungshi O Jembir Sb. Satemmongba GS AKM, Langpangkong yimtsüngtem shia nungi Yimden Yimsüsürtem aser Kaketshir Lenirtem jaoka takokba nung monga liasü.

Iba sentong shilem ana lemsar monga liasü. Mezüng shilem sentong-? nung Kr. Imonungla, Sobaliba Zulur LKM ajanga sentong lenia liasü aser sentong tenzüka maotang telok ajak saksalema noktaka alidang LKM wako atsüketta LKM Naklo ken aten. Iba sülen sentong tenzüka Sb. Imrong Pongen Chakpa ajanga sarasadem aser Sb. Imlinok, Tir LKM ajanga tarur pela-a agizükba den külemi LKM tenzüka aruba otsü aser Tsürapur Lenirtem oboula Lt. L.L Yaden Merangkong, oboula Lt. Obangtemjen Chuchuyimlang, oboula Lt. Imsongti Merangkong aser oboula Lt. L. Pangersowa Jamir Akhoya, parnok pezü-i anir nükjidong tulu yur Langpangkong nunger Kaketshirtem arok tebhong ka küma longjemer asen lima temaba jenjangi ajungkettsü nükla nung 1948 küm June ita 22 anogo Nükmen shitak amentetta tenzüka yutsüba bilemtetta jembia liasü. Aser iba anogo nung Lt. L. Pangersowa Jamir Trust Award agütsütang asen Lenir oboula-i Kaketshirtemji masatangtetti meimba temaitsü asütsü ta shia liasü aser iba den külemi koba LKM 'OCHIBA ELECTION' 1st July 2017 küm tenzüka, Iba ajanga tanü tesüyiba mapang dang nungi temelenshiba nung arur kechiyong asenoki ki ka kenüyongi merenemtet, anungji melongi suaka nisung dak tangatetba arutsuta yimlaseta shia liasü. Talisa Yimden Yimsüsübaji Tsüngrem nungi aser Ochiba Election nung Yimden Yimsüseri lenir shimba Yim nung temelenshi nüngdaker ta kaketshir ola ka ama ayimmoktsüa liasü. Iba sülen Kr. Imsünaro, Anaki Yimsen Kaketshir nungi "Kü Langpangkong" ta asüba tetezü tajung aliba ken ajanga shilem agi. AKM Tongti zulur ajanga Sentong nung tajungshi O jembidang ashibaji AKM den LKM-i teti ama liteppa Kaket riju ajungkettsü aser maparen balala ayika nung temelenshi asoshi meranga inyakba atema pelaba lemsatet aser ano maneni schooltem nung tesayur peria maliba, 5 tribes committee ajanga reservation review atema akangba, LKM Road Coordination Committee ajanga lenmang reprangba, Tim masüba saru noktangba, Foothill Road Coordination Committee maparen nung nungitba, item amala maparen nung maneni meranga tatem madong tashi noktaksüla ta shia liasü.

Wb. Imti, Asso. Pastor Chuchuyimlang Town Baptist Arogo ajanga LKM Nümnenmong aser takokertem ajak talisa Award angur ana HSLC Top 5 nung Sb.Akümmere Longkumer Wameken aser Kr. Mereninla Pongen Mongsenyimti asoshi tenüngsang aser temoatsü sarasadema liasü.

Sentong Akhümdong ajanga ashiba agi technology balala aser AI ajanga memetetba shisatsü ayika angur saka item amshiyim nung kanga memetaloki kümtanga amshitsüla aser chichiba shisaliok arangtettsü asoshi schooltem nung Vocational skills amala tangazükba agütsütsü aser tajangzük angutsü asoshi kanga nüngtaker aser iba ji sorkar dang akangtsüla ta shia liasü.

Tanabuba shilem sentong-II nung O Mechir Kr. Tianenla Lemtur ajanga agia liasü. Iba sentong nung OCHIBA ELECTION(CLEAN ELECTION) nung ajemtaker top 7 finalists tetoktepba mapang agia liasü aser iba tetoktepba nung tetendangertemji Sb. Luen, Asso. Pastor CBA, Wt. Lanumenla,Tesayur, RC Chiden Govt. High School aser Wt. Imlirenla, Senior Teaching Faculty NIELIT liasü. Tetoktepper rungnungi takoker anaji Mezüng jenjang nung Sb.Temjenzulu, Akhoya aser tanabuba jenjang nung Sb. Sangtoba Merangkong Kaketshir Telongjem nungi ta agüja liasü.

Iba sülen Onük Jembir ajanga OCHIBA ELECTION(CLEAN ELECTION) nung ajemdaker jembidang Ochiba ji Kibuba nem bendanga agütsüba, tazüokba, aser Alima putu yimya asüküm, azüapongba, ngasangatempa den saku süa maliba nungi adoker ta ashi. Itemji Kibubai molungba aser item taküm tatem makai alitsü saka Kibubai memolungbaji tesamaba nung adentsü ta shia liasü aser Ochiba nung noktaka Lenir shimba nung takoksa mali ta angatetba ji Naga nungeri MP ka Wb. S. Supongmeren Jamir shimba ajanga nüburtet asoshi temeten sorkar den jembiba aser tajangzük agütsüba ajanga angur. Pai sa tanü asen lima, asen litzü nungi tenzüka OCHIBA ELECTION Merüktetta agitsü asoshi Langlangkong nungeri molungtetta tenzüka ama Ochiba nung amitter Tsüngremi agizüktettsüsa pei Vote temeten rongsen yong yoka mechi-i, Senso candidate songtetta shimba meli-i yimden yimsüsürtem, watsü ojalatem, kaketshir tajungtem ajaki longjemer Ochiba nung noktaksü asoshi yimyim ayimmoktsüti ta ayungzüka liasü.

Iba sülen Sb. Ardangsen Tatong Tir LKM ajanga melepzüng O jembia aser tatem nung telok ajaki shilem agia sarasadem.

RECORDER
MEYITONGPANG
General Secretary

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngeru angateta agitsü mepishir

Impur nung Yisu Mesüka Leniba (Lead Like Jesus) sentong agi



Impur, Aami/June 22 (TYO): ABAM Youth Mission ajanga maneni Yisu Mesüka Leniba (Lead Like Jesus encounter) Zone 3 & 4 nung aliba lanur lenirtem asoshi June 20-22, 2025 anogotem nung Impur nung takok ngua agiogo, ta ABAM Executive Secretary, Rev. Temsü Jamir-i sangdong ka ajanga metetdaksü.

Ajak agi Asso. Pastor Youth-i anir Arogo 14 nungi lanur lenirtem 79 arua iba sentong nung aden. Rev. Temsü Jamir, Executive Secretary, ABAM ajanga okilaba mapang nung,

"Tenzükba yimya ajak rongnung tajungtiba aser tanü tensa nung takok ngua inyaktetsü asoshi lenisüba yimya ya Yisu Mesüka Leniba ya lir, kechiaser iba lenisüba yimya ajanga dang nüngdakbapur ajak tongteter," ta metetdaksü.

Paisa, "Tanü iba ya movement ka asünung, lenla ajak nung iba lenisüba yimya nüngdaka lir. Tanü na Arogo nung tenzüksüsa maongka anguba ya Tsüngremi Pa wadang nung nü shilem nüngdak ta shimba asünung, ajemalua nü tata shilem nung

nüngdakbapur tongtettsüsa tangazükba tulu mapang agiang," ta ajungshi.

Iba sentong nung shisalen sayurtemki Toshi Sanglir, Secretary, ABAM YM, Teka Imchen, Coordinator, ABAM YM, Roseline, Coordinator, ABAM WM aser Limasangwa, Coordinator, Media & Social Concern, ABAM nung liasü.

Maneni iba sentong agia aodang, Tsüngremer taochi nung aika tajanzük ngua asen lima nung temelenshi adoktsü tamang ayur.

Sudan kübok North Darfur state nung Tenla ki asem poksatsü

June 22, 2025: Sudan nung North Darfur state yimtiba, El Fasher nung tatalokba balala ana nung Rapid Support Forces (RSF)-i amakdang bomb agi Tenla ki asem poksatsüogo, ta osang ka ajanga metetdaksü.

RSF sepaitemi poksatsüba Tenla ki asemji Sudanese Episcopal Church, African Inland Church aser Roman Catholic Church indang Tenla kitem lir.

June 9 aser June 11 anogotem nung bomb amshia amakdang nisung pongu asü aser nisung 12 dak tali yiruogo, ta U.K nung amenoka aliba Khristan melungtet telok Christian Solidarity Worldwide (CSW)-i metetdaksü.

Bomb amshia amakdang asürtem rongnung Roman Catholic Arogo nung putir, Luka Jomo densema lir. Pa bomb agi yiruba sülen anogo ka lir June 12 nü asü.

El Fasher yimti ya Darfur nung RSF sepaitem tashi kübok maliba yimti ka lir. Yaküm April ita nungi sepaitemi iba region nung timtem agütsür.

RSF sepaitemi linük nung tesem balala parnok kübok aitdaksütsü atema Tenla kitem densema amaker, aser Tenla kitemji sepaitem camp ama amshia Arab nung masüba Khristanem anema asalentong

yanglua inyaker.

United Nations Security Council bangzüng ka ajanga RSF dang tashiyim mamshitsü mepishiogo, ajisüaka tang tashi sepaitem iba tesem nungjagi mainshir.

Taküm April ita nung RSF-i Abu Souk aser Zamzam camp na atsünga liasü. Camp ana ya Internally displaced persons (IDPs) meyirjang aika jenoka aliba camps lir aser iba tesem ya El Fasher nungi mile 9 shi dang pilar lir. Camp ana nungji IDPs 700,000 dak tema jenoka liasü, saka tangbo sepaitemi camp anaji RSF military camp ama amshir.

2023 küm April ita nungi Sudan nung RSF sepaitem aser Sudanese Armed Forces (SAF) sepaitem tsüngda rarar. Iba rara nung Tenla ki aika raksatsüogo.

CSW-isa Sudan nung Khristanem aika Islam yimsü dangi kangshia meyipdaksütsü rongshiba osangtem metetdaksü. CSW Tir, Mervyn Thomas-i sangdong ka ajanga sepaitemi El Fasher nung bomb amshia Tenla ki asem poksatsüba tatalokba aitsüogo.

Paisa, RSF aser SAF sepaitemi maneni International ozüngtem alema meimchir temeden balala anema inyaker, ta metetdaksü.

Thomas-isa, raraba mapang

nung Tenla kitem ya nüburtem jenokdaksütsü atema amshir, anungji Tenla kitem mamaktsüla, ta mepishiba den külemi tangsa rara anentsü aser linüktem-ia Sudan nung meimchirtem kümzüksü atema tiyongtsü ia inyaktetsü mepishi.

Taküm January ita nung US sorkari, RSF-i nübur aika tepseter ta sangdonga liasü, ta International Christian Concern (ICC)-i metetdaksü.

"RSF aser parnok den sendaktepa aliba teloktemi kin nung ajemdaker tanur-tain kecha mebendangi tepseter aser kinü tanurtem-a tepseter," ta ICC-i metetdaksü.

Ano sepaitemisa tetsürtem tashiyim amshia raksatsür, ta ICC-i metetdaksü.

UNICEF-i ashiba agi, tang Sudan nung tanur million 15 dak temai teyari balala nüngdaker aser iba nungjagi tanur million 4 shibo chiyungtsü agi kanga anünger.

Sudan nung tang tanur million 17 (linük nung school-i aotsüpur zünga shilem 90) bo school-i maoer aser tang tesem balala nung jenshia alirtem shilem 33 bo tanurtem lir.

UNICEF-isa, 2023 küm rara tenzüksüba sülen Sudan nung tanur 5,000 dak tali samaogo aser tanur 3,000 dak tali tepsetogo, ta metetdaksü.



agiba atema Khristan lenirtem aikati tejashi lemsatepogo. The Christian Institute Director, Ciarán Kelly-i, "1967 küm abortion Act agizükba sülen UK nung tanur million 10 dak tali raksaa indokogo. Tang maneni MP temi tebok nung aliba tanurtem kümzüksü atema ozüng kar aliba-a agienogo," ta metetdaksü.

'March for Life UK' p u s e m e r t e m i Parliament kima longkak aitba noksa nung angur. Tanur raksaa indokba ya ozüng alema inyakba mapa ka masütsü atema Parliament nung telemtetba

ANO GO ABEN TSÜNGREM DEN

Asenoki Sarasademer

Simon, Satani na tsüksü ama septoktsü mepitet.
Saka Ni na asoshi sarasademtsüogo.

Luk 22: 31-32.

T. Ken 50: 15 nung Tsüngremi ashir, "Aser timtemba anogo nung Kü dang jaang, Ni na kümzüksü aser nai Ni sentsüwangshitsü". Yangi Tsüngremi asenok dang sarasademtsü ashir. Pai asenok dang angashitsü nangzük. Pa teyari metetang ta Pai asenok dang ashir. Ibai asenoki kodang Pa nem tenüngsang aser tetushi agütsüdir idangji ataloker ta metetdi.

Kibubai sayuba sarasadem nung "Obala" jagi anogoshia asenoki pei asoshi aser tangar asoshi sarasademtsütsü bilemtetdaksür. Shitakba nung asenoki nisung ajak asoshi sarasademtsütsüla, tajungpur atema dang masü saka nüngdakbapur ajak asoshi, tashi maiter aser tashi aiter, aser ajemrepa alirtem asoshi.

Tanü Lai nungi Yisui Pa nütsüng Peter shiba tamang nung seplasepshia liasü, pa asoshi sarasademtsü. Asenokia tanela nung, tamang nung aser jakla nung tashi maitertem asoshi sarasademtsütsüla. Khrista ajanga Tsüngrem den tesendaktep shitak yur maneni sarasademba jagi mapa inyaker. Khristanemji tagutsürtem lir. Asenoki azü tokshir; rakzükrakter, temulung makai alirtem, mapa makai alirtem, aser ibala mesükba ajak asoshi temeim agi sarasademtsütsüla.

Laishiba nung shinzüka aliba atalok tenzüker: Yael Eckstein



Yael Eckstein

June 22, 2025: Tang Israel aser Iran na tsüngda ano rara tamajungba akümba mapang ka nung International Fellowship of Christians & Jews nung CEO, Yael Eckstein-i, tang tatalokbatem ya Laishiba nung ainkartemi shinzüka aliba atalok tetenzüker asütsüa akok, ta ashi.

Lai aniba organization-i tang Israel nung rara ajanga takoksa angur Israel nungertem nem teyari balala agüja arudar.

Laisa, Iran-i Yihuda linük (Israel) alima map nungi samatsütsü ta sangdongba densema kuli balala ajanga Israel-i Iran anema apusor, ta metetdaksü.

Laisa, Laishiba nung tatem anogo mapang nung Yihuda nungertem alima tesem ajaklen nungi Israel nung adenshitsü ta

shinzüka lir, anungji tang tatalokbatem ya Tejen Lai nung shia alibatem atalok tenzüker asütsüa akok, ta ashi.

"Iba lima madak Tsüngrem tekabu lir. Alima nung tanga limatem dang nungi Israel ya khenyongi balaka lir. Tsüngremi nüngja agütsüba linükji iba linük kija lir. Ainkartemi Yihuda nungertem meyipa arutsü atema shinba tesemji ibai lir," ta lai metetdaksü.

Eckstein-i, "Akhi puti otsü nung kin ka küm 2,000 dak tali bendanglen aliba aser tanaben pei kidangi shilangba nüburtemji Yihuda nungertem dang lir. Iba ya Tsüngremer sentong shilem ka asütsüa akok, aser iba ya Laishiba nung shinzüka aliba tetenzüker asütsüa akok, ta ni bilemer," ta metetdaksü.

AO OSHI ANGAZÜKDAK:**TANÜ ANGAZÜKTSÜBA OJANG****Tepelok**

(v) kecha mesütet, tazüya, junga inyak mashi (stupid, untidy)

* Tepelok nisung dak shingaia temulung malemer.

Tepen

(n) shiruru telanglen dena aliba shilem (tail)

* Nashi tepen agi manga merila zükshir.



Tir Yimyim

OLONG PAITEP # 7188

	1		2			3		4		5
6								7		
					8		9			
			10							
11										
				12						
13		14		15					16	
17								18		

TIPIEN

1. Inyaker ajangetba - (3)
3. Bangsemo adokdak - (5)
6. Shitak mesüi inyak - (7)
7. Ya mimong nung angur - (3)
9. Reprangzük - (4)
10. Tasola - (5)
11. S ____ - (4)
13. Yagi ajak ashiohtsür - (3)
15. Ki aokba oset - (7)
17. Ak shi nung inokba tasen - (5)
18. Ishika - (3)

LANGTSÜNGLEN

1. Meshidak - (3)
2. Tanaben soshir - (7)
3. Iba anogo - (4)
4. Meshi - (3)
5. Yagi mi tsükloker - (9)
6. Shi tapu ka - (9)
8. Yagi ayimer saka ozü masü - (3)
9. Ajokba shiruru ka - (7)
12. Inyaktet - (4)
14. ____ hi - (3)
16. Akümüli nungi pilar - (3)

OLONG PAITEP # 7187 TELANGZÜBA**TIPIEN :**

1. Telok, 4. Aluru, 6. Ozüing, 8. Emk,
9. Kin, 10. Teti, 12. Süir, 13. Jen,
14. Ola, 16. Talak, 17. Mazük.

LANGTSÜNGLEN :

1. Tenükjang, 2. Luden, 3. Kioktsü,
5. Lenti, 7. Tajangzük, 11. teronem,
12. Sempa, 13. Jahaz.

NAI-A YA METETTER MA

Taoba mapang England aser Gloucestershire fast bowler David 'Syd' Lawrence arishi küm 61buba nung süogo. Lawrence ya England nung asoba tanak nisung rognung England team nungi asayaba mezüingbuba cricket asayar liasü. Pa dak taoba küm motor neurone disease (MND) tashidak puteta liasü. Lawrence asaya aliba mapang England tenüing nungi Test pongu nung asaya aser Gloucestershire nungi küm 16 asayaba mapang pai asaya 280 nung wicket 625 agia liasü. Asaya nungi anenba sülen pa nightclub ka kibur aser amateur bodybuilder ka aküm aser 2022 küm Gloucestershire's club tir asütsü shima liasü.

Sorkar metentet tsüingda Manipur nung mepetmesü tembangtsüla: Shah

Imphal, Aami/June 22 (Agencies): Union Home Minister Amit Shah-i, Meitei aser Kuki-Zo nungertem tsüingda mangatettep aliba bentettsü maneni ayongzükogo, aser ashiba agi, mepetmesü mebentet tashi Manipur nung iba amala tensa ka nung sorkar ka amenoktsüji tasak asütsü.

Sorkar ka amenoktsüsa Manipur nung tang tashi tensa mejungi lir, ta Amit Saha-i national osang kaket ka den sensaksemba mapang ashi.

Manipur nung mepetmesü ya kin o kin tsüingda mangatettep dak sendaka lir aser iba ya kiralongrar mesüra linük anema nokdakba ken o ka masü.

Kuki-Zo MLA tem medeni tanga MLA temi state nung President's Rule tembangdaksütsü atema sorkar tasen ka tentettsü asoshi takok tashi merangba mapang Shah-i iba olen lemsatepa liasü.

State ya February 13 nü nungi President's Rule nung lir. Taoba Chief Minister N. Biren Singh-i February 9 nü mapa toktsüba sülen President's Rule benoka liasü.

Shah-i ashiba agi, Myanmar nungi Manipur-i nüburtem senoka aitba aser Meitei nungertemi Scheduled Tribe (ST) jenjang akhangba dak sendakba nung Manipur High Court order ajanga iba mepetmesü ta tenzüka liasü.

Paisa, küm asem mepetmesü nung arudar saka taoba mapang amadang tensa tajungba küma aotsü amanger, ta ashi.

Paisa, centre sorkari Manipur nung tensa ya political level nung sensaksemdar aser yakta takok angutsü imlar, ta ashi.

Kuki-Zo nungertemi Manipur nungi agiteta administration balaka asoshi akhanger aser kasa mapang nung Meitei nungertemi state melem dangner aser yimjung nung liner.

Manipur nung kin ana tsüingda 2023 küm May 3 nü nungi mepetmesü tenzüka aser tanga tashi nung nisung 260 dak tema süogo.

2027 census atema Assam renemshi tenzüko

Guwahati, Aami/June 22 (Agencies): Linük ajunga nung 2027 küm March ita nungi tenzüka census agitsü aliba atema Assam nung ketdangsürtem renemshi tenzüko. Ketdangsürtemi census agiba mapang tashi nungbo nütsünyongsük kanga agi timba kümer alitsü imlar.

India nung census ya tatemsa 2011 küm agi aser 2021 küm agitsü aliba COVID-19 wara poktetba ajanga magitet, ta Assam Tribune-i metetdaksü.

Centre sorkari taruba census ya 2027 küm March ita nungi officially tenzüksü lateta yuogo aser küm ana tsüingda tembangtsü imlar.

2011 census nung Assam nung nütsünyongsük ajak agi crore 3.12 shi liasü. 2015 küm tashi nungbo nisung crore 3.29

shi-i National Register of Citizens (NRC) nung züingoksemtsi atema apply asü, ajisüaka ketdangsürtemi lakh 10 shibo magizük.

Ministry of Statistics and Programme Implementation-i ashiba agi, 2024 küm tashi nung Assam nung nütsünyongsük ya crore 3.62 shi liasü.

Tang nütsüing renloka aoba apira census agi tenzüka mapang tashi nungbo nütsünyongsük taliba kümer alitsü imlar.

State ketdangsürtemi Assam Tribune dang ashiba agi, inyakyimtem tenzüko. Census officer tejentem aser state director tem New Delhi nung July 4 aser 5 nü ajurutepa inyakyimtem tembanga yanglutsü.

Assam atema nübu kwi

agitsü iba indang ketdangsürtemi asateta mali, saka kishia-i tua data bendentsü atema nübu aika nungdaksü imlar.

Enumerators tem atema digital app ka lapoktsüba ajanga tangbo census agiba inyakyim ya takaraba aotsü imlar.

Iba app yagi ketdangsürtem nem field nungi data idangjisa upload asütsü melatsü.

Mobile connectivity majungba tesemtem nung staff temi osang ya manually mangaoktsü aser network aliba tesem atongba sülen upload asütsü.

Tang mezüingbuba census agiba mapang caste enumeration ka dena alitsü. Taoba mapang tamangba yimsü indang osangbo benden saka cast data zütoka liasü.

Arunachal Police-i nisung shibelener ka apu; tetsür ana kümzük

Itanagar, Aami/June 22 (Agencies): Arunachal Pradesh kübok Siang district nungi arishi küm 15 aser 17 ta aiür chanu ana social media ajanga mapa agütsütsü nangzükur Raipur-i shibelener or aliba puteta Honibarnü kümzükogo. Aija alirtem rongnung tongtiba ya Dimapur nungi cook ka liasü aser iba ken o dak sendakba nung pa puogo.

Tetsür anarongnung ka tebui par jala samaba indang tashishiba ka June 10 nü agütsüba sülen tena ya kümzüksü atema maparen tenzüka liasü.

Nisung samaba indang ken o ka benokba sülen mapang tatsüka dang lir iba ya nisung shibelener ken o ka kümzük Bharatiya Nyaya Sanhita kübok sections balala dak ajemdaker ken o benoka liasü. Siang district Child Welfare Committee (CWC) nem iba osang ya agüja liasü, ta Siang Superintendent of Police (SP) JK Lego-i ashi.

Technical surveillance amshia police-i tetsürla ana ya Raipur nung lir ta meteta aküm. Vidhan Sabha police station-i teyari agüja tenaprongla kümzükogo. Tena Raipur nung government facility Sakhi Saheli

nung khen atema jenokdakja liasü.

Sub-inspector Tanu Padung-i anir police team ka Raipur-i oa tetsürla ana ya anir aru.

Tetsürla ana ya June 20 nü Boleng-i meyipa anir aruogo, kong tena temang tendanga liasü. Iba sülen tena ya counseling aser rehabilitation atema CWC nem bendanga agütsüogo.

Biushisüingdangba sülen aija alisang yagi social media amshia tena ya atsüa aru aser Boleng nungi Raipur tashi aotsü atema anepaluja liasü, ta SP Lego-i ashi.



Guwahati, June 22: Ahmedabad nung June 12 nü tsükokba Air India tayimtsü indang cabin crew Nganthoi Sharma Kongbrailatpam tasü mang Deobarnü tasoli Manipur tonga bener aruogo. Tebu Kongbrailatpam Nandesh Kumar Sharma indang DNA tendanga medem dangba sülen lai maitsü jangja liasü.

Israel-Iran rara nung US ajemokogo, Iran nung nuclear tesem asem amak



Washington/Tehran, Aami/June 22 (Agencies): United States-i Iran nung nuclear sites asem - Fordow, Natanz aser Isfahan nung takok ngua makogo, ta US Tir Donald Trump-i Honibarnü (par mapang) sangdonga Middle East nung tensa tali tamajungba akumer.

US-i Iran dang telemtetba agitsü hopta asem agütsütsü Trump-i telemtetba agia aliba den mapet amaker.

"Asenoki Iran nung Fordow, Natanz aser Esfahan densema Nuclear sites asem nung kanga takok ngua amakba maparen renemogo. Tang tayimtsü ajak Iran air space alema adokogo. Primary site, Fordow nung tayimtsü sünga bena aliba BOMBS tsükdaktsü. Tayimtsü ajak lendong makai kidangi meyipa shilangba mapang lir. Asen American Warriors nem tenüngsang agütsür. Iba ama inyaktü alima nung danga military mali. TANG YIMJUNG NUNG ALITSÜ MAPANG LIR!" ta pai pa indang Truth Social nung ashi.

Iranian nuclear sites nung amakba ajanga Tehran ya nuclear ken o jembidangi meyipa shilangtsü Trump-i imlar aser Iran linük telung nung US-i ano amaktsü tangbo sentong mali, ta iba inyakyim meteta alir osang kar ajanga osangbener dang ashi.

"Ibai UNITED STATES OF AMERICA, ISRAEL ASER ALIMA ASOSHI OTSÜSÜTSÜ MAPANG KA LIR. IRAN-I IBA RARA T E M B A N G T S Ü MULUNGTSÜLA," ta Trump-i mapang tatsüka lir ashi.

Open-source intelligence account nungi "Fordow samaogo" ta ashiba pai tanaben post sütsü. Fordow ya ali telung nung aliba facility ka lir, kong Iran atema uranium enrichment mapa inyaker, koba American "bunker bombs" dak alaka Israel indang nok-nü agibo raksatsütsü makok liasü ta ashir.

Mapang tatsüka lir Fox News den jembing, "Amaktsü atema ni hopta ana tsüngta telemtetba agitsü ta ashi, aser anogo ana ya hopta ana nungji lir," ta Trump-i ashi.

US B-2 bombers amshia amak ta ketdangsür ajanga ashir, koba Fordow raksatsütsüsa bomb tesashi bena aliba bomber senzüba osang liasü. Israel aser Iran tsüngta hopta ka dak tema anünglen nungi maktepa aruba mapang iba tesem ya amaker alitsü.

Israel indang public broadcaster Kan dang, US-i amakba nung Washington den linük kanga junga teka amteper lir, ta Israel ketdangsür kati ashi. Item tesem amaktsü aliba indang odang ya Trump-i anogo ka jakdang Israel Ato Kilonser Benjamin Netanyahu nem metetdaksür liasü, ta osang kar ajanga ashir.

Iran nunger indang nuclear sites nung US-i amakba sülen Trump aser Netanyahu jembiogo, ta White House ketdangsür anati ashi. Ajisüaka US-i mamakdang nuclear sites asemprong azüngteter liasü, ta Iranian media ajanga ashir.

Taoba Israeli Defence Minister Yoav Gallant-i Trump tenüng sanga, "Tir Trump-i United States, Israel aser

meimchir ajunga asoshi tasü tait telemtetba agi. Tangbo alima tajungba nung lir," ta ashi.

"Ghonda ishika süyigo, Qom indang air defences activate asüba aser tsükchir indang targets jangjatetba sülen, tsükchir temi tayimtsü amshia Fordo nuclear site shilem kar amak," ta Iran indang Tasnim news agency ajanga ashi.

Deputy Security Governor of Isfahan-ia central Iran nung Isfahan aser Natanz facilities makogo ta jangjatsü. "Isfahan aser Natanz nung aliba nuclear facilities anasa temelaba makai aitba asenok tenük agi nguogo. Tsükchir targets den raratsü asoshi air defences tem activate süogo," ta pai ashi.

Iran indang Atomic Energy Commission-i radioactive contamination aliba mesayur aser US-i amakba ajanga radiation temai adokba mesayur ta ashi. US-i tazü mapa inyaka amak aser international law nung aibelen aser Iran indang nuclear sentong manentsü, ta ashi.

US amokmerena Iran indang Supreme Leader Ayatollah Ali Khamenei-i, "America nungeri kodanga majangshiba teraksa tuluba ajurutsü imla atatsüla," ta ashi.

Foreign Minister Abbas Araghchi-ia par linük amakba yagi tatem maka timtem alitsü aser Tehran sovereignty kumzüka ayutsü temeden ajak amshitsü ta ashi.

US mitkari Iran nung item tesemtem amakba sülen US ozüng yanglur ajakibo pela magizüker, aser Republican Representative Thomas Massie-i Trump telemtetba ya constitution agi melaba ama masü ta aitsü.

Danga Republican temi ibai tim mapa inyakba lir ta tenüng asanger aser mitkar dang pelaba lemsatet. Külen Democrats temi Congress temelaba magi Trump-i danga linük den rarar ta aitsü.

Trump bhukumer Marjorie Taylor Greene-i yasüng X nung, "Teti America nunger tamaren akumtsü lia, asenok bendanger rara nung shilem agir," ta zülua liasü. "Ibai asen rara masü," ta lai ashi.

MOLUNG NEN O

Aser parnok tenük nungi nüktzü ajak pai aitoktsütsü, aser Tasüba joko malitsü, mangyimtsü mesüra tajeptsü, mesüra tekangshitsü joko malitsü, kechiyong tejenbatem süitemogo.
- J. Atok 21:4.



Kü temiem kinungbu Lt. Temjennungsang iba lima nüngi pilar onok mangyim jashi tia nung alidang kija kibong tembar, medemer, kinunger, atianütem, kiyonger aser Arogo lokti tented aser temiemertem shirnokisa onok dang meima nüngdak maparen ajak nung yaritepogo, nenok temiem sarasadem nübü aser rongsen agi nungita yariba, onok tashi aser tesünep agütsütak liasü.

Onoki nenok nisung shia dang tenungteta pelaba meshitetaka iba sabang ajanga ajak dang pelaba lemsateper.

Taochisang Tsüngrem kibubai nenok ajak talubosa moajangma ta onoki sarasademtsür.

~ Temiem Kinungtsü, Jala aser Kinungertem.

MENUNGRA BILEMTETER



ASÜ:
23-06-2024

ASO:
06-08-1966

ASÜR TIALEMBA

Temeim Oba tanü nai onok toktsür or küm ka abensar, na onok den meliaka onoki teti na menungra bilemteter. Na akümüli nung onok den aliba mapangtem bilemtetang onok tenük nungi nüktzü alua menungrar. Tanü na onok den meliaka onoki ne temeim bilemteta sarasadema amonger.

~ Temeim Kinungtsü aser Semchirtem.



Central Recruitment & Promotion Department
Corporate Centre, Mumbai. Phone: 022-22820427; Fax: 022-22820411

RECRUITMENT OF CIRCLE BASED OFFICERS
ADVERTISEMENT NO. CRPD/CR/2025-26/03 – CORRIGENDUM

INCLUSION OF ENGLISH AS ONE OF THE SPECIFIED LANGUAGE FOR NORTH EAST CIRCLE (FOR CANDIDATES WHO HAVE STUDIED AND PASSED 10TH/12TH STANDARD WITH ENGLISH LANGUAGE AS ONE OF THE SUBJECT FROM ARUNACHAL PRADESH / NAGALAND)

With reference to above advertisement, it has been decided by the competent authority to include **English** as one of the options of local languages specified for the North East Circle. (for candidates who produce 10th/12th standard mark sheet / certificate evidencing having studied and passed English as one of the subjects from any school located in the States of Nagaland and/or Arunachal Pradesh.)

Accordingly, the registration window for the post will be open to candidates for registrations from **21.06.2025 to 30.06.2025** on Bank website www.bank.sbi/current_openings under advertisement no. CRPD/CBO/2025-26/03. Candidates are advised to take note of the change and apply for the post, in case, they are eligible for the post. Candidates, who have already registered for the post, need not register again.

All other terms and conditions mentioned in the captioned dvertisement shall remain unchanged.

Place: Mumbai
Date: 20.06.2025

General Manager
(RP&PM)

Region nung yimjung asoshi tetsükdaktsü tulutibaji Netanyahu: Erdogan

Istanbul, Aami/June 22 (Agencies): Region nung yimjung asoshi tetsükdaktsü tulutibaji Israek Ato Kilonser Benjamin Netanyahu ya lir aser Iran-i United States den nuclear ken o jembi tenzütsü lia Israel-i amakba ya jembishinü raksatsütsü nükjidong nung lir, ta Turkey Tir Recep Tayyip Erdogan-i ashi.

Honibarnü Istanbul nung Organisation of Islamic Cooperation (OIC) senden nung Arab League diplomats den jembidang, Erdogan-i Israel

ajungmesotettsü tashi aliba linüktem dang par "miim" indang mangatsü aser rara tuluba mekumdaktsü jembishinü ajanga iba rara nung tangatetep kati arudaktsütsü merangtsü ajungshia liasü.

Israel-i Iran dak amakba ajanga Netanyahu aser par sorkari diplomatic yimya nung ken o kecha mebantetner ta sayur, ta Erdogan-i ashi.

"Netanyahu indang Zionist mangdang ya danga kecha masü saka asen region aser alima ajunga tesama tulu dangi

atsür onüba kisüng lir," ta pai ashi.

Paisa Western linük lenirtemi Israel nem talenba kecha makai teyari agütsür ta tai tongloksü. Turkey-i Middle East nung arütsü tem azü agi meyanglushidaktsütsü, ta pai ashi.

"Israel indang 'banditry' tatem kati arudaktsütsü asoshi asenoki Palestine nung kisüng masü, saka Syria, Lebanon aser Iran nung temeim sayutsü tongtipang lir," ta pai OIC lenirtem dang ashi.

1969 küm tentenba züngsem

57 aliba OIC züngsemtem-i par mission ya alima jung yimjung alitsü tangatetba nung Muslim lima tejangraba wazüka ayutsü lir ta ashir.

Erdogan jakdang Turkey Foreign Minister Hakan Fidan-i jembidang Israel-i Middle East okshia samadaktsütsüba leni atsür oa Iran amaker ta ashi.

"Tang Israel-i region ya okshia samadaktsütsü asoshi asen kidanger Iran amaker. Palestine nunger, Lebanon nunger, Syria nunger, Yemen nunger mesüra Iran nunger

tebilemtsü mali saka Israel nunger tebilemtsü tejangja lir," ta pai ashi.

Hokulbarnü Iran Foreign Minister Abbas Araghchi-i, Israel-i Iran amakba anen nung dang ozü linük US den jembishinü akatsü renema lir, ta ashi.

"Tashiyim amshiba anenba sülen aser tashiyim amshir temi mapa tamajung inyakba asoshi temerenshi agütsüba sülen Iran-i maneni diplomacy atema bilemtsü renema lir," ta Araghchi-i ashi.

35+ Mokokchung Football League-i ayongzüka Mokokchung nung football coaching akatsü

Mokokchung, Aami/June 22 (TYO): 35+ Mokokchung League-i achayanga 23rd nungi 27th June, 2025 anogo pungu nü Mojabi Futsal Turf, Salangtem Ward, Mokokchung nung "grassroot football coaching clinic" sentong ka akatsü sentong renema lir, ta osang ka ajanga metetdaksüogo.

Iba coaching tenzükba sentong 23rd June, 2025 nü nikongdang 2:00 ako nungi akatsü. Iba sülen telemsa (category-wise) balala asoshi

coaching-ji maparenji tenzüksü. Iba sentong nung adentsü atema tsüraburtemi pei chirnur meina arutsü pela shishia jaoker, ta tayongertemi metetdaksü.

Osang tajung kaji - iba coaching nung Barack FC, Nagaland, Coach, Brando Kamson-i anir par telok arutsü. Coaching ya lanur football jangrartem nem lenmang sayutsü nükjidong nung ayonga akar, ta parnokisa ashi.

Iba coaching nung adentsü asoshi tanur shirnokisa tenüng

agütsüogo, tsüraburtemi football kits timi anepalua bener yoktsü mepishir, ta parnokisa metetdaksü.

Iba coaching ya lanur football jangrartem asoshi angazüksü maongka aser telungjem mapang tajung ka asütsü imlar, ta parnokisa shisem.

Iba coaching dak sentakba nung osang tejangja aginürtemi iba contact number - +917629017838 (Aongsen Aier, Convenor, 35+ MFL) tongteprateptsü akok.

Vondrousova-i Berlin Open kokogo



Berlin, Aami/June 22 (Agencies): Taoba mapang Wimbledon champion Marketa Vondrousova-i Deobarnü Berlin Open tetsür kija asaya nung Chinese tsür qualifier Wang Xinyu koba iba asayamung kokogo.

Arishi küm 25 tain Czech tsürula ya yiruba ajanga ita 12

tashi junga masayatetba sülen la tang world rankings nung jenjang 164buba nung lir, aser la 2023 küm Wimbledon akokba sülen Deobarnü mezüngbuba final asaya liasü.

Iba asaya akoktsü atema lai kanga meranga asayaogo aser tatem nung lai asaya 7-6(10) 4-6 6-2 agi kokogo. Mezüngbuba

set nung tiebreak asayaba mapang lai set points trok tashi kümzüka liasü.

Wimbledon tenzüksü hopta ka dang lia Vondrousova-i iba asayamung ya kokogo, anungji la Wimbledon nunga asayar tongtibang ka asütsü imlar.

"Hopta tepeyong jangradema asayaogo aser ni pusemba atema pelar," ta Czech tsürula yagi asayamung akokba sülen ashi. Lai tang tashi nung title asem bena lir.

"Hopta tepeyong kanga junga asayaba atema tenünsang agütsür, nai kanga junga asayaogo," ta lai Wang dang ashi.

Wang, shiba qualifying asayaba sülen iba asayamung main draw nung asaya liasü, lai top-20 asayar pezü akokba sülen la indang career nung mezüngbuba final tongteta liasü, aser final nunga lai baseline nung kanga junga asaya-a Vondrousova nem timtem agütsü.

Final nung asayar anapronglai kanga junga asaya aser kanga toktepba asayaba sülen tatem nung Vondrousova-i takok nguteta liasü.



Antwerp, Belgium kübok Wilrijkse Plein nung Belgium aser India na FIH Hockey Pro League asayaba mapang Thibaut Stockbroekx-i goal idaktsüba noksa nung angur. Iba asaya Belgium-i goal 6-3 agi koka liasü.

Mbappe temang tajungba kümogo: Alonso

Aami/June 22, 2025 (Agencies): Real Madrid manager Xabi Alonso-i ashiba agi, striker Kylian Mbappe shiranga aliba temang tajungba kümogo. Pa Fifa Club World Cup nung Deobarnü Pachuca den asayatsü aliba asaya nungbo masayatetsü, saka pa group stage nung tatembangbuba asaya nungbo asayatetsü, ta Alonso-isa shisem.

Mbappe temang nung timtem aliba ajanga Mongolbarnü training nung shilem magi aser Real pur Bodhbarnü Saudi Arabia indang club Al-Hilal den Miami nung goal 1-1 agütsür tembangba asaya nunga masayai liasü.

Arishi küm 26 asayar ya mozükidangi anir ao aser temang anepaluba sülen Brehostibarnü yok aser Palm Beach nung iba La Liga club indang training complex-i meyipa ao. Real-i ashiba agi, pa gastroenteritis agi timtema liasü.

Pa Real Madrid pur Mexico

club Pachuca den Deobarnü asayatsü aliba asaya atema team-mate tem den mao, saka pa iba asayamung nung mezüngbuba Hokolbarnü Red Bull Salzburg den asayaba mapa asayatsü akok.

"Pa temang tajungba kümogo," ta Alonso-i ashi, shibai May ita Carlo Ancelotti ket nungi coach mapa agizüka liasü. "Pa mozükidang nungi adoker joko anogo anabuba."

"Pa anogoshia temang tajungba küma odar aser taruba asaya nung asayatetsü imla atar," ta paisa shisem.

Mbappe ya taoba küm lemluwa free transfer nung Real Madrid nung oa aden aser iba Bernabeu club nung mezüngbuba season asayaba mapang pai asaya 56 nung goal 43 idakja liasü.

Real puri La Liga, Champions League aser Copa del Rey mekoktetaka pai European Golden Shoe ngua liasü.

Casper Ruud temekok yiruba ajanga Wimbledon masayatsü



Aami/June 22, 2025 (Agencies): Norway nunger asayar Casper Ruud temekok yiruba ajanga maneni timtemba mapang pai Wimbledon nung masayatsü atema telemtetba agiogo, ta pa indang management team-i metetdaksü.

World No. 16 aser French Open nung anaben tashi final tonga asayar alisang ya mimlai lia taoba ita French Open nung tangbuba round nung tsüka liasü. Pa Portugal nunger unseeded asayar Nuno Borges-i tsükdakja liasü.

Ruud ya mezüngbuba June 21 nungi 28 tashi ATP 250 Mallorca Championships nung asaya-a grass-court season tenzüksü liasü. Ajisüaka Norway nunger asayar yagi pa temekok nung timtem aliba ajanga masayatsü telemtetba agi.

"Pa court-i ia asaya tenzükogo aser kanga junga asaya odar, saka tang tangbo best-of-five sets asayatsüji karara. Casper atema taruba asayamung Gstaad nung asütsü," ta manager Tina

Falster-i NTB dang ashi.

Ruud-i tang tashi nung Wimbledon nung asemben tashi tanabuba round tonga asayar lir.

Ruud-i 2025 küm Spain nung kanga junga asaya-a temaba jenjang nung asayartem aika akok aser Madrid Open koka liasü.

Ajisüaka clay aser grass nung asayaba mapang arishi küm 26 tain asayar yagi junga masayateti arudar. Rome nung Jannik Sinner kanga mejungi makokba sülen pa Roland Garros nunga tanabuba round nung tsüka liasü. French Open nung asayaba mapang Casper Ruud temang anep-alutsüsa aküm aser iba ajanga pa fitness dak sendakba nung tebilemtsü aliba süoki ia bilema liasü.

Iba sülen Ruud ya competitive asaya ka nung danga masaya aser Paris nung tanabuba round nung tsükba sülen pa asayamung ka nung danga asayaba jangja mali.

Wimbledon ya June 30 nü tenzüksü aser Gstaad nung Swiss Open ya July 14 nü tenzüksü.

BILEMDANGANG

"Tali bilemba agi tesunep samadaksür."